

मार्निंग डोगरी न्यूज़ बुलेटिन, समे. 09.20 Hrs

<><><><><><>

Headlines

1. मुख्यमंत्री ओमर अब्दुल्ला होंरें हांगुल ते इंदे रौहने आहले इलाकें दे संरक्षण लेई सफारशें पर तौले कारवाई दा धेइया फही पक्का कीता ऐ।
2. जम्मू-कश्मीर विधानसभा दे स्पीकर अब्दुल रहीम राथर होंरें बेंगलुरु च 11में सीपीए भारत क्षेत्रीय सम्मेलन च हिस्सा लैता ते लोकतंत्र गी सशक्त बनाने च सकारात्मक बैहस ते चर्चाएं दी भूमिका पर लोs पाई।
3. खेड्ड मंत्री सतीश शर्मा होंरें युवाएं दी भागीदारी ते खेड्डे दे विकास बारे युवा मामलें सरबंधी केन्द्री मंत्री हुंदे कन्नै वर्चुअल बैठका च हिस्सा लैता।
4. जम्मू-कश्मीर स्कूली शिक्षा बोर्ड आसेआ अज्जै थमां 10मीं ते 11मीं जमात दे म्तेहान लेने दी प्रक्रिया फही शुरु कीती जा'रदी ऐ।
5. मौसम विभाग नै जम्मू संभाग दे किश जिलें च अज्ज हौली थमां दरम्याने दर्जे दी बरखा बरने दी पेशगोई कीती ऐ।
हून खबरें दी तफसील कन्नै अभिलाषा शर्मा।

<><><><><><>

CM-Hangul Conservation

मुख्यमंत्री उमर अब्दुल्ला होंरें धेइया पक्का कीता ऐ जे उन्दी सरकार अगले सम्मेलन शा पैहले-पैहले हंगुल ते मारखोर दी आबादी च सुधार करने लेई दुए अंतरराष्ट्री सम्मेलन दरान कीती गेदी सफारिशें पर तेजिया कन्नै कम्म करोग। मुख्यमंत्री होंरें एह गल्ल कल स्कॉस्ट कश्मीर च सम्मेलन दे समापन सत्र गी संबोधित करदे होई आक्खी। इस सम्मेलन च भारत दे बाहरले मुख्यें थमां आए दे वैज्ञानिकें, माहिरें ते नीति निर्माताएं हिस्सा लैता। इनें सब्बनें गी संबोधित करदे होई मुख्यमंत्री होंरें आखेआ जे संरक्षण छड़ा जनौरें आस्तै गै जरूरी नेई ऐ, सगुआं मनुक्खी अस्तित्व आस्तै बी अत लाजमी ऐ। उनें आखेआ जे हंगुल, मारखोर जां कुसै बी लुप्त होने दी कगार आहली प्रजाति दा संरक्षण पर्यावरण गी संतुलित बनाई रखने लेई बी बड़ा जरूरी ऐ।

<><><><><><>

CM-Friday Prayers

मुख्यमंत्री उमर अब्दुल्ला होंरें मिलाद-उन-नबी दे बाद औने आहले जुम्मे दे मौके पर कल हजरतबल दरगाह पर जाइयै ज्हारां बददेश्रद्धालुएं कन्नै जुम्मे दी नमाज अदा कीती। इस मौके पर मुख्यमंत्री होंरें गी पैगम्बर मोहम्मद हुंदे पविततर अवशेष दी झलक दिक्खने दा सम्मान होसल होआ। उनें जम्मू-कश्मीर दे लोकें लेई शांति, तरक्की ते खुशहाली लेई प्रार्थना कीती। इस मौके पर साबका मुख्यमंत्री डॉ. फारूख अब्दुल्ला ते मुख्यमंत्री हुंदे सलाकार नासिर असलम वानी होर बी उत्थे मौजूद हे।

<><><><><><>

Speaker-CPA

जम्मू-कश्मीर विधान सभा दे स्पीकर अब्दुल रहीम राथर होरें आक्खेआ जे लोकतंत्र दी मजबूती लेई बैहस जरूरी ऐ। उनें एह गल्ल कर्नाटक दे बेंगलुरु च 11में कामनवेल्थ पार्लियामेंट्री एसोसिएशन, इंडिया रीजन सम्मेलन च बोलदे होई आक्खी। उनें इब्बी आक्खेआ जे जिसलै विधायक रचनात्मक विचार-विमर्श च हिस्सा लेंदे न तां व्यवस्था च जनता दा भरोसा बधदा ऐ। उनें दस्सेआ जे एह भरोसा उसलै बनदा ऐ जिसलै अस रुकावटें थमां अगगै बधिए गल्लबात दी बक्खी बधने आं ते निजी हमलें कोला उप्पर उठियै नीतिएं दा विश्लेशण करने ते छड़ा शोर-शराबे कोला बचियै सोच-विचार करने आहली बक्खी जन्ने आं। 11 थमां 13 सितंबर 2025 तगर चलने आले इस प्रतिष्ठित सम्मेलन च उद्घाटनी भाषण लोकसभा स्पीकर ओम बिरला होरें दिता।

<><><><><><>

Sports Minister

युवा सेवाएं ते खेड्डें सरबन्धी मंत्री सतीश शर्मा होरें कल इक वर्चुअल बैठक च हिस्सा लैता जेदी अध्यक्षता केंद्री खेड्ड ते युवा मामलें दे मंत्री होरें कीती। इस बैठक दा मकसद खेड्डें दे विकास ते नौजवानें दी भागीदारी ते सशक्तिकरण सरबन्धी मसलें पर विचार-विमर्श करना हा। इस बैठक च होरनें राज्यें ते केंद्र शासित प्रदेशें ते खेड्ड मंत्रियें बी हिस्सा लैता। गल्लबात दरान मंत्री सतीश शर्मा होरें जम्मू-कश्मीर च खेड्डें दे क्षेत्र च होआरदी तब्दीलियें गी उजागर करदे होई आक्खेआ जे खेड्डें संघर्श गी आकांक्षाएं च तब्दील करने लेई बिथ पुरने दा कम्म कीता ऐ। उनें केंद्री मंत्री होरेंगी जम्मू-कश्मीर खेड्ड नीति-2022 दे असर बारै बी जानकारी दिती जेदे कन्ने मकामी हुनर दी पंछान पर जोर दिता जंदा ऐ। एहदे अलावा इस नीति तैहत बुनियादी ढांचे च सुधार ते पूरे खिते च सेहत ते तंदरुस्ती आहले रौंह गी अपनाने पर ध्यान केंद्रित कीता जंदा ऐ।

<><><><><><>

Programme-Announcement

सेवा सप्ताह 2025 दे तैहत आयोजित बक्ख-बक्ख कार्यक्रमें ते गतिविधियें दे इक हिस्से दे तौरा पर आकाशवाणी दा क्षेत्रीय समाचार एकांश जम्मू, औंदी 15 सितम्बर गी दिनें 12 बजे 25एं मिनटें दी इक वशेष परिचर्चा प्रसारत करने जा'रदा ऐ-जेहदा विषय सार ऐ- "मिट्टी थमां स्मृद्धि तगर दा सफर, राई-बाई ते करसानें दा सशक्तिकरण"। इस कार्यक्रम च स्हाड़े परौहने होगन- स्कॉस्ट जम्मू दे सॉयल साइंस डिविजन दे हेड प्रो. विकास शर्मा होर- जेहड़े इस विषय दे बक्ख-बक्ख पैहलुएं पर लौ पागन। उन्दे कन्ने गल्लबात करगन अभिलाषा शर्मा ते विजय बजाज। 25एं मिनटे दा एह कार्यक्रम 15 सितंबर गी दिने 12 बजे प्रसारत कीता जाहग, जिसी तुस स्हाड़ी FM फ्रिक्वेंसी 100 इशारिया 3 मैगाहर्टस ते कन्ने मीडियम वेव 303 मीटर यानि 990 Khz पर बी सुनी सकदे ओ।

<><><><><><>

ते हुन बाकि दिएं खबरें कन्ने विजय बजाज।

JK BOSE Exams

जम्मू-कश्मीर स्कूली शिक्षा बोर्ड नै जानकारी दिती ऐ जे इसलै चला'रदे 10मीं ते 11मीं जमात दे म्तेयान अज्जै थमां फही शुरू होआ'रदे न। मतेयान देने आहले बच्चें गी एह सलाह दिती गेई ऐ जे ओह शिनाख्त लेई अपना दाखला कार्ड अपने कन्ने रक्खन। मतेयान केंद्रें पर तक्क रखने आहले अधिकारियें गी निर्देश दिते गे न जे म्तेयानें दा सुचारु संचालन यकीनी बनान।

<><><><><><>

DC-Ramban NHW Review

रामबन दे डिप्टी कमिशनर मोहम्मद आलियास खान होंरें एसएसपी अरुण गुप्ता हुंदे कन्नै कल जिले च ट्रैफिक नियमें ते जम्मू-श्रीनगर राष्ट्रीय जरनैली सिडकं (NH-44) दी स्थिति दा व्यापक जायजा लैता। डीसी होंरें गड्डिं दी आओ-जाई दे कन्नोकन्नी मौजूदा हालात दा जायजा लैने लेई नाश्री दा दौरा लाया। इस दौरे दा मकसद अडचनें दी पन्छान करना ते इस महत्वपूर्ण रस्ते पर गड्डिं दी सुचारू आओ-जाई गी यकीनी बनाना हा। समीक्षा दौरान डीसी होंरें ट्रैफिक प्रबंधन गी बधाने आस्ते रणनीतियां तैयार करने लेई सरबंधत अफसरें ते एजेंसियें कन्नै गल्लबात बी कीती। एहदे मगरा उनें भट्टी च करोल-मैत्रा-गूल सिडकं पर बेली पुल दे निर्माण दी प्रगति दा जायजा लैता, जेहूड़ा फौज आस्सेआ कीता जा'रदा ऐ।

<><><><><><>

NHW-Status

जम्मू-श्रीनगर राष्ट्रीय जरनैली शिडक पर ट्रैफिक दी आंशिक तौरा पर आओजाई शुरू करी दिती गई ऐ। अज्ज गड्डियें गी जम्मू थमां कश्मीर घाटी आहली बक्खी जाने दी इजाजत दिती गई ऐ। राष्ट्रीय जरनैली शिडकें दे किश हिस्सें पर मरम्मत आहले कम्मं दे चलदे गड्डियें गी इक्के बक्खी औने जा जाने दी खुल्ल दिती गई ऐ। इस बारे होंर जानकारी सहाड़े जिला संवाददाता कोला।

<><><><><><>

Fruit-Traders

उधमपुर च गोल मेला इलाके च सब्जी मंडी ते फलें दे बपारियें गलाया जे लम्में चिरें थमां शिडकें दे बंद होने करी उनेंगी बड़ा मता नुकसान पुज्जा ऐ। उनें दस्सेआ जे पिछले किश दिनें थमां लगातार शिडकां बंद होने करी फलें दे टूके गी शिडकें पर गै रोकेआ गेआ ऐ जेदे नै उनेंगी बड़ा मता नुकसान पुज्जा ऐ। एहदे अलावा मकामी लोके गी बी आओजाई च परेशानियें दा सामना करना पवा'रदा ऐ। इस बारे होंर जानकारी सहाड़े जिला संवाददाता थमां

<><><><><><>

Weather

मौसम विभाग नै अज्जै थमां जम्मू-कश्मीर दे किश जिलें च दरम्याने दर्जे दी बरखा बरने दी पेशगोई कीती ऐ ते किश थाहरें पर हल्की बरखा दी मेद दस्सी ऐ। विभाग नै 14 थमां 17 सितंबर बश्कार किश थाहरें पर गरज-चमक ते हौली बरखा दी बी पेशगोई कीती गई ऐ।

<><><><><><>